



山川典第三十四卷

五臺山部雜錄

聞見後錄五臺山佛光其傳舊矣唐穆宗實錄元和十五年四月四日河東節度使裴度奏五臺山佛光寺側慶雲現若金仙乘駿猊領其徒千萬自巳至申乃滅又峨眉普賢寺光景殊勝不下五臺在唐無聞李太白峨眉山詩言仙而不言佛華嚴經以普賢菩薩爲主李長者合論言五臺山而不言峨眉山又山中諸佛祠俱無唐刻石文字疑特盛于本朝也

後山談叢婺州李翁與鄉人如五臺山衆少皆騎翁老且躡獨步行既至衆所見端相如常翁與山東老人所見寶閣千疊山東老人持菩薩戒四十年矣

輟耕錄五臺山有鳥名寒號蟲四足有肉翅不能飛其糞卽五靈脂當盛暑時文采絢爛乃自鳴曰鳳凰不如我比至深冬嚴寒之際毛羽脫落索然如殼雖遂自鳴曰得過且過嗟夫世之人中無所守者率不甘湛澹鄉里必振拔自豪求尺寸名詫九族儕類則便志滿意得出肆入揚以爲天下無復我加矣及乎稍遇貶抑遽若喪家之狗垂首貼耳搖尾乞憐惟恐人不我恤視寒號蟲何異哉是

可哀矣

五臺山部外編

清涼山新志漢明以前聲教未至臺山聖境聞者尙稀況身歷者乎其時林木茂密虎豹縱橫五峯之徑人跡罕通偶有川原平衍之地皆黃冠所居惟遙望五峯祥光煥發神燈夜懸皆以爲神人之都相傳有仙人者頂縮五髻衣掛三縷或獨行無伴或羣兒相逐望之儼然卽之便失或云周時卽在此山或云莫窮其始嗣以人蹤日繁出入漸少住山黃冠俱目爲素衣仙後漢時尚有見者至魏晉間遂絕蹤跡三晉異記曰無恤登常山西占紫雲之瑞疑鴈代間有王氣因獵于五臺之阿倏爾雲淡若水見神人焉衣素容若金儼若熙若占之蔬祭吉遂罷獵而返後寶藏經至乃知五髻童子文殊化身也漢中印度有摩騰法闍二尊者以天眼觀震旦有大乘根器緣會已熟并觀五臺文殊所居而聖教未至知歸者少遂齋釋迦文佛畫像並四十二章經將東適震旦時孝明帝永平七年正月夜夢金人身高丈餘赫奕如日來詣殿庭旦令占之傅毅對曰臣覽周書異紀云西方有大聖人出其沒于載教當及此今陛下所夢無乃是乎帝遣王遵等十八人西訪至月氏遇二尊者

延請東還于永平十年丁卯十二月至洛陽以經像上帝帝披氎觀像果與夢符帝以預夢告騰蘭對曰此如來以大法囑累于陛下願陛下勉之帝問法王出世何以教不及此對曰聖人應必以時形必以感彼土乃大千世界之中羣靈並集根器先熟他機未感故佛不應譬之池澄而月皎否則晦矣豈月之咎哉況教化所及各有遲速亦隨其宜也帝問此土豈無聖人居化耶對曰此土有五臺山者乃文殊大士所居攝化無量天龍鬼神然非戒定澄神者莫能覩也至次年春禮清涼山回奏請鼎建伽藍復言山形宛同印度靈鷲山寺宜卽用爲名帝以始信化緣加大孚靈鷲寺卽信也仍度僧數十居之先是此山皆黃冠所居佛化旣至異道無光十四年正月五臺道士白鹿等與五嶽道士褚善信等謀奏帝焚經以辨真僞帝許之于十五日帝幸白馬寺道士立壇設祭集七十二子書于壇中騰以佛舍利經像置于壇西齋訖道士執香炬遶壇泣曰臣等上啟太極大道元始天尊衆仙百靈今佛教亂夏正道失蹤元風墜緒臣等敢置經臺上火取驗欲使開示蒙心得辨真僞便縱火焚經經從火化悉成灰燼道士失色時佛經像烈火不燒舍利光明旋空成蓋摩騰法蘭踴身虛空現十八變爲帝說偈曰狐非獅子類燈非日月明池無巨海納丘無嵩嶽榮法雲垂法

界法雨潤羣萌顯通希有事處處化羣生事畢卽旋印度焉唐太宗登梵經臺賦詩曰門徑蕭蕭長  
綠苔一回登此一徘徊青牛漫說函關去白馬親從印度來確定是非憑烈焰要分真偽築高臺春  
風也解嫌狼籍吹盡當年道教灰 元魏大孚靈鷲寺春三月設無遮齋有貧女莫知所從二子

一犬隨之身無餘資剪髮作布施復告主僧曰吾有急務欲他往幸先分我齋僧卽與饌三分女曰  
吾犬亦應得食僧勉強與之女曰我腹有子更須分食僧怒曰汝求僧食無厭腹中未生之子卽隨  
汝食何用更分濫餐之心抑至此乎貧女被訶卽說偈曰苦瓠連根苦甜瓜徹蒂甜三界無著處致  
使阿師嫌乃踊身虛空化菩薩相犬爲獅子兒爲二天童瑞雲縹緲復說偈曰衆生學平等心隨萬  
境波百骸俱舍盡其如憎愛何時一衆數千人悲泣向空曰願大聖示平等法門我等奉行空中偈  
曰持心如大地亦如水火風無二無分別究竟如虛空冉冉上升而隱其地以貧女所施之髮建塔  
供養萬曆初主僧圓廣重加修葺千塔下掘得聖髮數絡其色如金視之閃爍不定塔在大塔院寺  
東卽古雜花園也 又大孚靈鷲寺有三沙彌聞山多仙靈相約裹糧訪焉深山大壑靡幽不至  
餓盡不歸採葉充飢誓以覩聖爲期已逾三月共息樹下有巨人沿嶺而來身黑如漆而有光明沙

彌遮跪其前曰聖者願遺道術巨人大罵排突而去沙彌追之數里見大石穴卽投身而下沙彌正驚訝間忽雲中飄墮一人招三沙彌同入穴中行數十步舍闔投明過界作碧琉璃色空中懸明月珠光逾日輪照耀其人授沙彌醇酒曰飲之得度沙彌以師戒不受其人曰汝旣不飲仙不可得沙彌欲辭還其人曰天已暝可暫止宿其人忽不見沙彌各宿一窟有女子忽來侵之各念求仙未得反遭魔障遂牽連遁出已行數十里有天童從空飛來曰大師見汝奉戒堅貞故贈汝神藥用遂汝願人各一莖其色如玉食已身遂飄然而舉歸辭其師而去莫知所終

熙平初懸壺山有沙門

靈辨者頂戴華嚴日夜行道于五頂之間足破血流曾無少怠如是三載精勤如初一夕松下坐忽爾心光凝湛見異比丘摩其頂曰子勤苦且久當以信心入三摩地矣自是若夢忽醒一切文字觸目冰釋造論一百卷以釋華嚴孝明帝請于式乾殿敷揚奧旨宰輔重臣皆北面而聽後終于清涼北齊僧祥雲者并州周氏子童年依本州僧統靈詢披剃欲覩其宿習開經藏任其採取乃得涅槃經讀之不期年一部成誦日持一遍以爲常及聞清涼靈境負經往遊棲止大孚寺一日見數官服者光明俊偉至雲前拜起曰弟子方潔吾居願神足降重行道七日以叨福庇師卽隨行北趣數里

忽雲霧晦冥俄頃雲開眼界非常前入大宅庭宇甚嚴富麗無並雲乃升堂坐而問曰公等何官鉅富乃爾其人對曰我山神也慕師道行故特奉扳所進食饌味非世有行道七日圓滿神具珍奇爲贈雲固却不受神請所需師云貧道德業未成所患壽命不長修持不終如檀越不棄貽我靈藥以永殘齡固所願也神曰斯亦可爾取藥一莖色白如玉以貽師餌之遂獲登仙還經詢所禮謝不知所終

釋明助者定州人嘗闢華嚴經知清涼山乃文殊所居遂負笈來遊深林幽谷靡不詢歷偶值異僧容貌甚奇乃相結作伴欣得同志行三日至東臺半麓見一敝屋中有數僧容貌鄙陋威儀疎野勤意慢之日曛遂寄宿茅菴中夜同伴僧疾作困篤呻吟至旦吳穢莫近伴謂助曰我病甚沉汝當先行勿相滯也助曰吾遊禮畢當復相顧遂舍伴而行離菴數武忽聞其後錚然有聲回顧茅菴條焉俱失方悟聖境幻化自慨愚暗號痛踊絕懇禮旬餘更無所見既歸白之耆宿宿曰據公之罪有二焉見僧生慢棄侶獨行由斯雖入聖叢如隔山岳矣助承茲誨終身持敬以事病僧爲誓願焉

後周時有梵僧自天竺來云禮伽葉佛說法處及清涼山文殊住處適關西僧道信等數十人隨行至菩薩頂中夜入火光三昧現文殊聖像夜盡全滅了無遺跡乃知卽大士化身也

娑婆寺僧道明者志業禪觀探求聖境攜一沙彌至東臺花林山入谷偶聞神藥奇香見石曰方搗藥訖而無人明自慶曰吾求聖境日久彷彿在茲矣躑躅間忽二丈夫從深林出形容光偉明卽稽首求哀丈夫曰且止俟我白家有頃一人來招謂沙彌曰汝且勿隨恐觸清衆沙彌強隨入行數十步忽見茂林清泉名花異果堂閣殊麗儼若天宮清衆穆穆具大人相瞻仰無厭有一長者顧謂明曰此衆眞實安容繁瑣汝速送沙彌出更來就座明如命方出數步回首俱失惟峯嵐黯淡而已師徒歎恨而歸

隋高節者并州人年十七厭塵勞求出世父母以其不事家人生產亦欲捨之一日辭親由代郡入臺山不避虫獸直造幽深于北臺後谷見一頭陀苦茅爲居節一見卽生難遭想長跪求度僧曰汝能食我食而後可度節卽採葉而食汲泉而飲居數日初無厭怠復懇求度僧曰能誦法華而後可度節經七日法華成誦僧曰汝能攝念一坐七日必當得度節卽飽食木葉澗漱已一坐七日從定而起覺身心輕利法喜無量長跪白僧曰至哉大師令我得法安穩願以大慈度我出家僧曰我年髦矣不能令汝成道今長安有臥輪禪師可往依之節曰請和尚道號弟子受持僧曰我海雲比丘也節泣拜而歸赴長安詢輪公所在而投謁焉輪問所從來節曰弟子自五臺山

奉和尚命來投師輪曰汝和尚何名節曰我師海雲比丘也輪大驚曰海雲卽華嚴經中善財所參第三知識非萬劫修持莫能暫遇汝棄此大聖而來從我何其悖耶節方解悟遙望五臺猶思再覲辭輪而返復履舊境惟茫茫荒麓已

代州趙良相家資鉅萬有二男長曰盈次曰孟盈強孟弱良相死盈盡佔其產止與孟園屋一區傭力自活無何趙盈死卽生孟家爲兒名環後孟亦死生盈之子家爲兒名先洎長而孟家益貧盈家益富趙環卽傭工于趙先家求活環一日聞其寡母曰趙盈霸汝家產致汝世貧今爲其奴可不恥乎環因懷恨欲殺趙先開皇初環從先遊五臺入峨谷東數十里深山無人環搏刃謂先曰爾祖我父兄弟也爾祖佔我遺產致我世貧今執役于汝何其忍乎吾今殺汝先卽疾走環逐之恍惚之間見草菴遂趨入有老衲謂環曰爾何爲者曰吾逐讎也老衲大笑曰爾其勿逞我令汝自識之各以藥物授充茶湯食已各如夢覺追憶往事大生慚愧瞬息之間衲與菴皆泯二人遂棄家結茅修道終于彌陀菴卽今之法雲菴也

解脫和尚代州邢氏

子卅歲辭親于五臺山昭果寺披剃圓具戒從抱腹山志昭禪師叅學昭深器之未幾返昭果晝誦大乘夜則禪觀嘗于東臺麓見草衣比丘跏趺石上卽前叩首曰欲見文殊乞爲指示比丘指金蓮

花解脫願之比丘卽失脫于石畔哀祈頂禮日夜無間精苦彌勵久之卽臺麓間再覩比丘于圓光中現半身語曰夫解脫者當求諸己而由人乎言訖不見於是狂機頓歇深契無生得大法喜卽發誓願我得此法不應獨善願與一切含靈共之說是語已卽入三昧于三昧中見諸佛現形說偈曰諸佛寂滅甚深法曠劫修行今乃得汝能開曉此法眼我等諸佛皆隨喜解脫問曰寂靜之法若爲可說以教人耶諸佛偈曰方便智爲燈照見心境界欲究眞法性一切無所見州牧請師適州傳戒畢東歸途中日暮自念不得燒香供養蹶蹣慙忽聞空中聲曰合掌以爲華身爲供養具善心眞寶香讚歎香雲布諸佛聞此香時復來相度汝今勤精進終不相疑悞自爾法澤普霑盛化五十餘年後不知所終

唐法順和尚姓杜氏如晦族長世傳文殊化身降靈于雍州萬年縣神跡炳著不可勝紀有患聾者投師師呼之則聾愈有患瘧者投師師與之言則瘧愈武功縣僧爲毒龍所魅衆掖以詣師師端拱面之坐龍遂附病僧曰大師所向義無復留尋卽釋然師大弘華嚴圓頓之旨作法界觀文簡理盡天下宗之唐太宗召謂之曰朕苦勞熱師之神力何以蠲除師曰聖明御寓微恙何憂但頒大赦聖躬自安上如言頒赦疾遂瘳因賜號曰帝心弟子智儼傳其教是爲三祖弟子

智冲辭赴五臺禮文殊師授以函曰若見文殊當開視之及至臺山深林幽谷罔不遍歷忽逢山叟語之曰子奔馳憔悴欲何求耶冲曰求見文殊耳叟曰文殊行化長安未歸此何得見冲詢爲誰叟曰法順和尚也冲悟開函視之有偈曰遊子漫波波臺山歷土坡文殊祇遮是何更問彌陀回視其叟倏然不見冲急歸長安而順已遷化矣時貞觀十四年五月也師有法身頌曰嘉州牛吃草益州馬腹脹天下覓醫人豕猪左膊上義學茫然莫窺其旨

佛陀波利者北印度罽賓國人也忘身

徇道遍探靈跡及聞震旦有曼殊住處遠涉流沙特來禮謁以高宗儀鳳元年達茲土至臺山生大欣慰五體投地向空白云如來滅後衆聖潛靈惟大聖文殊師利大悲無盡于此山中汲引羣生某痛切生遭末季不覩聖容遠涉流沙敬來瞻禮伏望大慈令我暫接慈容仰垂聖訓白已悲泣向山頂禮忽見老人自谷中出作婆羅門語謂波利曰汝謂情存至道遠訪聖蹤漢地衆生廣造黑業出家之士多犯戒律西土有佛頂尊勝陀羅尼經能滅重惡業垢汝持來否答曰某直來禮謁未將經來老人曰汝當速返取此經來利濟衆生卽是面覩諸佛豈一文殊而難見哉波利聞已不勝欣慶禮老人足舉首失之悲喜交切畢志捐生復還西土求佛頂尊勝陀羅尼經于永淳元年回至長安

具事上聞高宗大悅命日照三藏與波利叅譯特賜波利絹三千匹留其原本波利泣奏曰貧道委命取經爲濟羣品非圖富貴也願陛下開一視同仁之心而流布焉上憫其志乃留唐本還其梵文波利將詣西明寺與沙門正順等重譯訖波利持梵本往五臺入金剛窟竟不復出或云旣入窟已見帝網光明聖真穆穆顧同行在外復出招之未旋踵間聖境卽失惟穴存焉波利遂于巖畔坐脫無著文喜禪師嘉禾語溪朱氏子七歲薙染習律聽教以會昌沙汰返服韜晦大中初例重懺度于鹽官齊峯寺謁大慈性空禪師指令過叅乃詣五臺山華嚴寺前暫憩遇一老翁牽牛而來至無著前問曰子欲何往答曰欲入金剛窟不得其門翁曰且就吾家少息啜茶著卽隨行五十餘步抵其家翁呼均提有童子應聲出迎翁縱牛引師登堂堂宇皆耀金色翁踞牀指繡墩命坐問曰近自何來著曰南方翁曰南方佛法如何住持著曰比丘少奉戒律翁曰多少衆著曰或三百或五百著却問此間佛法如何住持翁曰龍蛇混雜凡聖交叅著曰多少衆翁曰前三三與後三三翁呼童子點茶并進酥酪著納其味心意豁然翁拈起玻璃盞問曰南方還有這箇麼著曰無翁曰將甚麼吃茶著無對時日色將晚著問翁擬假一宿得否翁曰汝有執心在不得宿著曰某甲無執心翁曰汝曾

受戒否著曰受戒久矣翁曰汝若無執心何用受戒著辭退翁令童子相送著問童子前三三後三  
三是多少童召大德著應諾童曰是多少著復問此是何處童曰此金剛窟般若寺也著悽然悟彼  
翁者卽文殊也不再見卽稽首童子願乞一言爲別童說偈曰面上無嗔供養具口裏無嗔吐妙  
香心裏無嗔是珍寶無垢無染是真常言訖均提與寺俱隱但見五色雲中文殊乘金毛獅子往來  
忽有白雲自東方來覆之不見時有滄州菩提寺僧修政等至尙聞山石震吼之聲著因駐錫五臺  
至懿宗咸通三年始至洪州印心于仰山後旋浙住龍泉寺錢王奏賜紫衣將順寂告衆曰三界心  
盡卽是涅槃跣趺而逝塔于靈隱之西塢後漢天福二年叛卒發藏塔肉身不壞爪髮俱長錢武肅  
王重加封瘞宋南渡寧宗嘉定庚辰遷瘞于淨慈永明壽禪師塔左 按舊志無著入金剛窟傳著  
爲永嘉董氏子年十二依本州龍泉寺出家天寶八年得度至大曆二年遊清涼山遇牽牛老叟考  
五燈會元無著文喜禪師嘉禾朱氏子七歲薙染武宗會昌沙汰返服後再懺度於齊峯寺歲月姓  
氏互異舊志言立化於金剛窟前會元言順寂於龍泉寺後移瘞南屏今淨慈之窰堵儼然而臺山  
無可稽考故改從會元而舊志有老人爲無著說偈若人靜坐一須臾勝造恆沙七寶塔寶塔畢竟

化爲塵一念靜心成正覺會元無之附錄於此以補缺略云

廬門太守李靖不信神佛傲慢無

禮任代州摧毀梵刹不可數計因獵縱馬於中臺之野見僧與婦人共浴於池靖大怒援弓射之望其僧偏袒一肩以受矢冉冉東南行而泯追至菩薩頂見文殊普賢二像矢插文殊之肩靖大悔恨泣謝而去諸叢席賴以保全

神英禪師滄州韓氏之子卅歲得度壯依南嶽神會大師咨出世

道久之一日會謂英曰汝緣在北清涼聖地好建法幢勿滯此也英承誨北遊開元四年至臺山憩華嚴寺齋後獨遊西林披雲深入忽覩一寺額曰法華院英入瞻禮有多寶佛塔一座珠玉爲飾縹緲入雲後有仁王殿黃金爲瓦琉璃爲壁中設文殊聖像目髮紺青身紫金色其諸堂舍深邃不能遍探僧儀光偉默坐不語英叩執事欲依衆清修執事可之復曰汝衣鉢在外可卽持來英出取衣鉢還尋其寺了無所見惟深林密箐而已英徘徊哀感卽其處建法華院今鞠爲荒蔓矣

道義

禪師江東人受業衢州龍興寺于開元二十四年與杭州僧普守同遊五臺于清涼寺掛囊二人同訪聖跡至南臺北嶺畔見一老僧神彩巖峻鬚髮皓然乘白象循嶺而來二人驚愕避路稽首象行如風倏然而過欲隨其蹤寒風驟起歸宿清涼寺明日復尋嶺上見乘象老僧拽杖而來謂義曰汝

可急行及中齋也義叩首曰師今何往老僧曰太原章尹家齋汝勿遠去待回相邀義顧盼之間已失老僧而身及同伴並抵齋所舉預僧食瞬息而返復在嶺畔義與伴竊爲驚惶復念老僧所誨徐行林中待之忽見童子黃衫麻履自東林出至義前合掌曰我名覺一奉和尚命請衢州義閣黎吃茶義欲呼伴覓之已失遂隨童子行百餘步忽見金橋義卽隨登進一大寺殿堂僧舍垣牆皆金色炫耀地爲碧琉璃所成義隨童子入東廂第一院見老僧坐金繩牀謂義曰閣黎來耶義具威儀頂禮訖老僧命設小座令坐義叩問曰和尚常說何法誨人答曰春樹彌陀佛秋花觀世音又問此中爲娑婆耶爲淨土耶老僧以白拂擊牀曰閣黎會麼義曰不會老僧曰汝不會是娑婆耶淨土耶義曰某甲適來遊山惟見丘陵草樹今見此處金玉樓臺是以淨穢不決聖凡莫辨老僧曰閣黎豈不見道龍蛇混雜聖凡同居汝但分別見盡聖凡安寄言畢童子卽捧茶藥與義啜香美清奇非世間味茶畢命童子引令參堂歷十二院及大食堂徧觀聖衆或論法義或惟默然曾莫測其數義忽思同伴在近不得預參聖會潛出門度橋招之回首卽失其境惟餘烟靄榛莽義惶遽伏地悲號而同伴已至具言所見歎恨而歸後人建金閣寺以識其地焉

李通元嘗遊五臺於善住院逢異僧

授以華嚴經旨談論至暮僧將別去李長者曰天色垂暮師欲何適僧指北峯頂其行飄然若御風長者追之不及至夜望峯頂火光亘天詢之寺主答以野燒長者念異僧適彼此必神光非野燒也卽拽杖縱步而登至頂見火更熾周方里許視其中建紫金幢先異僧趺坐其下大眾圍繞梵音琅琅長者心維設我投中得覲聖師燒身無憾卽躡身投入頓覺清涼法喜無量方擬趨前頂禮其境已空長者卽于是處坐三日而後下山至西谷口遇數童子目光外射天衣飄搖乘風而過長者稽首童曰疇昔之夜投身光中者非子耶長者曰然復問仁者師爲誰童曰吾師妙德耳長者欲挽衣隨之童曰汝宿願弘經何得忘却揮手飛去長者念大士授旨釋經此地嚴寒遂南徙孟陽之方山鑿巖以居柏葉和棗作餅如錢日餌七枚時稱棗柏大士口出光以代燭猛虎馱經仙童汲水論成四十卷及決疑論行世開元二十八年春唱寂于石室卽太原之鎮山也 僧法照者南梁人也大曆二年春於南嶽雲峯寺食堂前趺坐澄寂間有五金臺現於鉢中瓊樓紺殿衆寶莊嚴內外明澈晃若臨鏡萬菩薩影并現於中移時方滅心甚疑焉歸寮白衆時有嘉延曇暉二閣黎者爲之解曰如師所覩乃清涼山也師之道緣必於斯境師盍歸歟照雖奇之歸心猶緩四年在衡州湘東寺

閣上結念佛三昧六月二日未時五雲擁寺雲中現金玉樓閣中有彌陀及文殊普賢高座巍然梵  
衆羣繞照與衆僧咸觀如隔烟霏哀泣頂禮至西方滅至晚照於道場外經行值前見梵衆持錫而  
行照問曰師等住於何所僧曰吾儕家五臺子盍歸乎言畢捨去照因思昔觀遂結伴北遊次年夏  
始達臺山遙瞻五頂宛符舊境止息佛光寺晚事禪寂白光起於北谷來燭照前照卽起整衣依光  
而行東北里許澗下有石門照叩門久之童子出謂照曰子來何遲也引度溪橋花木秀鬱臺殿參  
差文殊大士坐講堂高座萬聖圍繞照頂禮再三咨求至道大士示以念佛三昧命以是法流布人  
間復示偈曰汝等欲求解脫者應當靜念彌陀佛妙相明時更觀察無相無生不可取反窮觀者無  
所得於無得中常精進一切衆生本覺心卽是諸佛法身體覺體寂然常離念良由念起卽無明返  
照窮流諸念盡卽見如來平等身圓明寂照同虛空証入菩提無上果照聞己身心清涼如祛重負  
生大欣慰五體投地起已開眼聖境皆失照奉持終身轉相勸勉後不知所終

釋窺基俗姓尉

遲其父敬宗任松州都督伯父卽鄂國公敬德也基童年依元奘法師披剃永徽甲寅年十七帝特  
旨度爲大僧入慈恩寺叅譯一切經論過目成誦義亦能解從奘師受瑜伽唯識宗旨著論百部號